

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Neka je hvala Allahu koji odlikovao mjesec ramazan nad ostalim mjesecima, učinivši post u njemu jednim od šartova islama rekavši: „**O vjernici! Propisuje vam se post, kao što je propisan onima prije vas, da biste bili bogobojazni.**“ (El-Bekara, 183)

U ramazanu je započelo objavljivanje Kur'ani Kerima za kojeg Allah kaže: „**U mjesecu ramazanu počelo je objavljivanje Kur'ana, koji je putokaz ljudima i jasan dokaz pravog puta i razlikovanje dobra od zla.**“ (El-Bekara, 185)

Večeras nam, ako Bog da, nastupa najodabraniji Allahov mjesec. Dolazi nam period kojeg vjernička srca s velikom radošću iščekuju kao što žedna i ispucala zemlja čeka kišu da padne. Naš dragi gost, mjesec ramazan se sprema da posjeti naše domove, zakuca na vrata muslimana i tražiti izuna – dopuštenja da uđe. Blago li onima koji ga prime u svoj dom, a teško li

onima koji ga odbiju i ne dozvole da u njihov dom uđe.

Ramazan je dakle tu pa je dobro i više nego potrebno da se zapitamo jesmo li ga braćo i sestre spremni dočekati i da li smo se kako treba pripremili za njegov dolazak?!

Kada se govori o pripremama za ramazan najčešće ljudi misle na materijalnu pripremu, valja napuniti frižidere i zamrzivače, kupiti namirnice, urediti kuće.... Međutim, ova vrsta pripreme bi trebala da bude sporedna, a duhovna priprema da bude osnovna i najvažnija.

Od prošlog ramazana brzo je prošlo mnogo vremena, ako ga pretvorimo u sate, minute ili sekunde, mnogo toga čovjek učini i kaže što ne bi trebao, grijesi se namnože, nemar obuzme ljudsko srce. Zbog svega toga Uzvišeni Allah nam šalje ramazan kako bi putem ovog časnog mjeseca očistili svoja srca od grijeha, od lijenosti, gafleta i zaborava.

Poslanik, s.a.v.s., je rekao: „**Onaj tko provede ramazan u imanu i ihtisabu (računanje nagrade kod Allaha) biće mu oprošteni prethodni grijesi.**“ (Buharija i Muslim)

Dakle da bi ramazan djelovao na čovjeka i da bi došao do oprosta mora se ramazanu prići sa

dubokim imanom, sa istinskim uvjerenjem da je to naredba od Allaha, da to nije nikakva dijeta, program mršavljenja i tome slično.

Zatim, ono što moramo da vjerujemo jeste da će nas Allah zbog našeg podnošenja gladi i žeđi, suzdržavanja od prohtjeva, nagraditi svojom neizmjernom nagradom, jer je On rekao: „**Post je moj i ja za njega nagrađujem.**“

Šta smo osim punih frižidera i ostava pripremili? Kako ćemo da provedemo ovaj ramazan? Hoćemo li šta novo naučiti, koju suru, dovu, pročitati knjigu islamske tematike, možda Poslanikovu, s.a.v.s., biografiju – Siru i slično? U čemu ćemo provoditi dane, a u čemu noći? Hoćemo li iskoristiti ovaj ramazan za svoje duhovno uzdizanje i nadogradnju, hoće li to biti mjesec ibadeta, mjesec Kur'ana, namaza, dova i zikra ili će to biti mjesec traženja izgovora de se ne posti i samozavaravanja?!

Ima ljudi koji se istinski raduju ramazanu i nastoje svaku minutu tog blagoslovljenog vremena da iskoriste, jer su svjesni riječi Allahova Poslanika, s.a.v.s., kada govoreći o ramazanu kaže: „**O ti koji želiš dobro približi se, (radi ga), a ti koji želiš zlo odmakni se.**“ Takvi se pripremaju za ramazan čineći Allahu tevbu,

kajući se za svoje grijehе, moleći za oprost. Takvi imaju namjeru ako Bog da u ovom časnom mjesecu Kur'an da prouče. A koliko nas će to učiniti? Vallahi je to idealna prilika za sjecanje nebrojenih sevaba, jer se dobra djela u ramazanu nagrađuju višestruko, pa zato gledajmo u čemu će nam ramazan proći.

S druge strane ima i onih koji će ramazanske dane da provode na sasvim suprotan način, to su oni koji od ramazana neće imati ništa do li gladi i žeđi. U nekim dijelovima islamskog svijeta u toku ovog časnog mjeseca ramazana se zamijeni dan za noć. Čitavu noć se sijeli da bi se poslije sehura leglo i spavalo skoro do ikindije namaza. Teško da će takvi i slični zaslužiti Allahovu Milost.

Prenosi se da je Allahov Poslanik, s.a.v.s., na početku ramazana, sakupio ashabe i održao na početku kojeg je rekao: ***“Došao vam je ramazan. To je mjesec Allahovog blagoslova. Allah vas u njemu čuva, spušta vam Svoju milost, briše vam grijehе i uslišava vam dove. Allah vas gleda kako se natječete u ramazanu i ponosi se s vama pred melekima. Dajte sve od sebe da kod vas Allah vidi samo dobro. Doista je nesretan***

onaj tko bude uskraćen Allahove milosti u ovome mjesecu!” (Taberani)

Subhanallah, zamislimo koju počast imamo kod Allaha da dok se mi natječemo u činjenju dobra Allah se ponosi nama pred svojim melecima, zato nastojmo da Allah u ovom mubarek mjesecu koji je pred nama ne vidi od nas ništa drugo do li dobro.

Neka nam je mubarek ovaj mjesec i molimo Allaha da ga dočekamo, provedemo i ispratimo onako kako to čine iskreni Allahovi robovi.

Amin!

Prethodne hutbe potražite na našoj stranici: www.medzlis-split.org

Pripremio: Vahid ef. Hadžić

Split, 26.5.2017.

